

5. oktober 2022

Meeqqanik pinerliisimanginnermut uppersaatinik piumasaqaateqartussaataaneq pillugu Inatsisartut inatsisaata allangortinnera pillugu Inatsisartut inatsisaat.

(Ilinniartitaanermut, kultureqarnermut, timersornermut ilageeqarnermullu Naalakkersuisoq)

Inuiaqatigiittut ajornartorsiutitta annersaat ilaattut imaluunniit annersaattut Siumup isumaa naappertorlugu taasinnaasorisarput tassaavoq meeqqanut kinguaassiuutitigut atonerluisarnerit annertooujussuunerat. Meerartagut sunut tamanut sernissugassaraagut, taakkuami siunissaraagut aammalu ajunnginnerpaamik peroriartorneranni atugassaqartinnissaat qulakkeerniagassarlutigu.

Meeqqanut kanngutsaatsuliortarnerit akiorniarlugit ukiuni kingullerni annertuumik suliaqartoqartarsimanera Siumumiit qujamasuutigaarput, taamaaliornikkummi ajornartorsiutaasup annikilliarortinnissaanut inuiaqatigiittut akisussaassuseqarluta iliuuseqarfisaratsigu.

Suliasarli suli annertoqaaq, taamaammallu pinaveersaartitsinerup sukut tamatigut iliuuseqarfiguarnissaa pingaaruteqarluinnartoq Siumumi isumaqarpugut.

Meeqqanik pinerliisimanginnermut uppersaatinik pissarsinissamut pisussaaffeqarnermut periarfissaareersumiit ullumikkorniit annertunerulersitsinissaq Siumumiit taperserparput, taamaalilluni meeqqanut 18-it ataallugit ukiulinnut tamanut illersuinissaq qulakkeerneqartussaammat.

Taassumap saniatigut aammattaaq Siumumiit iluarisimaarparput atuuffiit annertusinissaannik siunertaqarneq, soorlu toqqaannartumik meeqqanut attuumassuteqarfigiqanngikkaluit, soorlu angallassissutini, taxani il. il. ingerlatsisuusut aamma piumasaqaateqarfigineqalertussaassammata meeqqanik pinerliisimanginnermut uppersaatinik. Tamanna ajunngilluinnarpoq, sulilu meerartatsinnik illersuinerunertut iliuusaasutut taasariaqarluni.

Inatsisimmi aalajangersarneqartut eqaatsumik piuminartumillu atortinneqarnissaat eqqarsaatigalugit Naalakkersuisut tassaunakkut qulakkeerrinninnissaat pingaaruteqarluinnartoq Siumumi isumaqarpugut, tamannalu inatsimmi matumani allangortinniakkami qulakkeersimaneqarnersoq paasisaqarfigissallugu Siumumiit soqutigaarput.

Siumumiit taamatut naatsumik oqaaseqarluta Meeqqanik pinerliisimanginnermut uppersaatinik pissarsinissamut pisussaaffeqarneq pillugu Inatsisartut inatsisaata allangortinneqarnera pillugu Inatsisartut inatsisissaattut siunnersuut tapersiissuteqarfigaarput, Inatsisinullu ataatsimiititalimi sukumiisumik suliarineqarnissaa innersuusutigalutigu.

Anders Olsen, Siumut